



## Terenga 4: Hōtaka 15 - E hia ō tau?

### He Mihi

E tau, aku manu kākā, aku manu tāwaka, e tau. Mena rā he wai kaihua kei konei e nā ai te warawara, inumia. Mā reira e mākūkū ai te korokoro, e reka ai te reo korokī me te reo korihi.

### Hei Mahi Whakarongo

Kāore e ārikarika ngā hua o te whakarongo ki ngā whakamārama e pā ana ki ngā whakataukī huhua o te motu whānui. I te rā nei, ka rere ngā whakamārama a Erima Hēnare mō te āhua o tana tupu hei teina i roto i tana whānau. Anei ngā pātai hei whakautu mā koutou:

- 1) Pēhea te pakeke o ana tuāhine?
- 2) Nōnahea ia i whānau ai?
- 3) He aha te whānuitanga o tana kōrero mō te kauae runga me te kauae raro?

### He Whakamārama

I a tātou ka kōrero i te pakeke o tētehi tangata, me tūpato, kei puta ēnei momo hapa:

E tekau tau aku pakeke. ✗ Tekau tau taku pakeke ✓  
E tekau taku tau. ✗ Tekau aku tau ✓

Anei ētehi huarahi hei pātai i te pakeke o tētehi tangata, me ētehi whakautu:

- P: E hia ō tau?  
W: *E rua tekau mā toru aku tau.*
- P: E hia te pakeke o tō tama?  
W: *E rima marama te pakeke.*
- P: E whia te kaumātuatanga o tō koroua?  
W: *E waru tekau mā whitu tana kaumātuatanga.*
- P: Ka hia ngā tau o tō whaea i tēnei tau?  
W: *Ka whitu tekau tana pakeke hei a Here-turi-kōkā.*

### Hei Mahi

Whakautua ēnei pātai e whai ake nei:

1. Ka hia ō tau i tēnei tau?
2. E hia ngā tau o tō hoa?
3. E hia ō tau i te wā i tīmata ai koe ki te ako/kōrero i te reo Māori?

Whakamāoritā ēnei rerenga:

4. I'll be twenty one in October.
5. My baby is 10 months old.

### Whakautu:

1. Ka rima tekau aku tau i tēnei tau.
2. E whā tekau mā toru ōna tau.
3. Tekau mā tahi tau taku pakeke i te wā i tīmata ai au ki te ako i te reo Māori.
4. Ka rua tekau mā tahi tau taku pakeke hei a Whiringa-ā-nuku.
5. Tekau marama te pakeke o taku pēpē.